

# Fasnacht 2015



## KNOCHESTAMPFER WAGGIS

SIT 1972

## S Gschyss um D'Aéro-Nation Suisse oder Jubilare statt Fluugi kreiere...

Wo's kirzlig by Volgg und Bundesroot  
um die neye Fluugi goot  
do wird's der bewusst, e weeneli spoot  
hättschs gar nit dänggt und glaubsch es fascht nit  
dass es by uns tatsächlich – e Luftwaffe gitt !  
dä Gedangge isch e bitz e Schämmer  
denn in dr Zytig glääse hämmer  
s'Militär in dr Luft, s'syg wirgglig woor  
gäbs nämmlig scho sit hundert Joor  
E ganzes Joorhundert so fliegendi Kischte  
wo sälschternananti Spezialischte  
mit Utopischte und Optimischte  
Militarischte und andre Statischte  
durch Warte-, Zahligs- und Abstimmigsfrischte  
sich zämme juristisch mien duuremischte  
do kasch der dängge, wie me do moschtet  
und wie mänggs scho in dr Blaanig verroschtet  
wie zum Bischpill die Mirage, wo, bevor me sy boschtet  
scho s Dopplet – und im Chaudet dr Boschte koschtet...  
Will me nochhär nimm so vyl zaale wott  
gitts e Zytlang numme billige Schrott  
prompt sinn e baar Hunter als Folg dervoo  
zerscht nit uff - oder grad wieder aabe koo  
Bevor sone Fluugi am Himmel duet suure  
hänn scho alli vorhäär e dummi Schnuure  
drum gitts nit sälte – und das isch s Harte  
e Buuchlandig amme scho vor em Starte  
und immer hett me n ys versproche  
s näggscht Mool denn weniger Gäld z'veloche  
By de maischte Pleitene, Päch und Panne  
haut sich denn d Luftwaffe sälber in d Pfanne  
Wie d Schwoobe kauft me zerscht Mässerschmitt  
s glych Flugzyyg wie die – dasch sicher kai Hit  
und wo's denn an dr Gränze e Zwyschefall gitt  
waiss niemert, weeli sinn uns – weeli nit...  
Druff bricht me fyr Schwyzer Fluugi e Lanze  
D' N 20 verregge scho by de Finanze  
Und d' P 16 seet me n au nit lang danze  
die fliege anderscht uf e Ranze  
anstatt in d'Luft – geen die, s'macht weh  
uff Diefstation – in Bodensee  
und stoot me denn doo, mit absägte Hoose  
kunnt die näggschti Blamaasch, miend jetz guet loose  
wo sy z Bärn dr Milan vo de Franzoose  
gegen-en-US-Corsair dien verlose  
hetts politisch grad baidi verbloose  
so setzt me wyter – s'isch ehnder mies  
uf die alte Hunter – zum halbe Bryys  
Dr Tiger ändlig duet Besserig bringe  
aber dä gitts au erst nach langem Ringe

und bym näggschte Typ gitts wieder Protäsch  
me kheytt wägem Bryys scho fascht ussem Näscht  
s'isch dr F/A 18 – wo's hitte no duet  
und drum hätt men au langsam e neye z'guet  
aber s Volgg losst sich nit vom Ueli lo schelle  
s'hett dä Gripen-Virus aifach nit welle  
s'haisst, me haig dä in Schwede nit welle bstelle  
denn via IKEA wär dää sowieso  
ohni Gebruuchsaawiisig koo  
oder in Schwedisch wo d' nit kasch verstoo  
so miess jede Pilot rund zwai Joor schetze  
zum sy aigeni Kischte zämme z'setze...

Au zum Hundertschte isch no ain bassiert  
d Luftwaffe hett mit eme Chaos brilliert  
s'hett e fremde Fetzel e Fluugi entfiert  
däm hett me numme noochgestieert  
me haig kai Pilot und kai Fluugi gfunde  
z'Nacht blybe die alli am Boden unde  
das syg ganz normal, do gäbs nyt z'stritte  
me syg gschuelte und trainiert und gieng an d'Limte  
aber bittscheen... numme – zue Byyrozytte !  
Wottsches also us dr Luft attaggiere  
kumm jo nit znacht zum ys z'ampètiere  
denn hetts kaini Pilote, wo sich deplaziere  
au frieh am Morge dien sy nit reagiere  
s'kennt sy, sy wäre no am Rasiere...  
und am Noomidaag schliesslig, kumm nit nach de viere  
denn do sinn sy bereits am Meditiere....  
sy sinn kaini Banause, hänn au kaini Flause  
Aber wenn sy Pause hänn, hänn sy Pause...  
Nummen ehrlich, wenn der scho am Boode wännnd floone  
no schigged doch s näggschd Mool zum s Budget schoone  
anschtatt Flugli aifach e Hampfle so Droone...  
Entsprächend hetts d'Präss mit dr Luftwaffe schwär  
denn fascht immer fallt irgendain yber sy här...  
wo negativ sy Muul verriss...  
...anderscht dregege by dr Patrouille Suisse  
dert gitts erscht sit 50 Jeerli e Gschyss  
und das positiv maischtens, dangg ihrem Flyss  
denn mit ihrer Artistik, es isch kai Mär  
trotzt die jedem Militär-Gekäär  
vergässen isch jeede Luftwaffe-Fruscht  
d Patrouille Suisse verschafft ys Luscht  
stolz wirft sich s ganzi Land in d Bruscht  
und das nit numme am erschten Auguscht  
In Payerne fyrt me fyr alli Gescht  
mit dr Luftwaffe zämme – e grosses Fescht  
nyt steert dert d'Jubileeumsfraid  
nur de Russe sait me, s' duet ys laid,  
wills by eych dehaime Lämbe git  
wämmer eyri Flugli nitt  
s'hänn hald Angscht kha die Schwizergnaabe  
dr Putin kheytt aabe - in Röschtigraabe..  
Dr Speaker vom Meeting isch vo Eeschtriich ko  
me hett en troztdäm ynegloo  
doch hett er nyt verlutte loo  
vomene Fallschirm-Zwyschefall  
s syg ain go z gumpe – im Ueberschall  
scho hett me gmaint, jetz gäbs e Gnall  
do sait ganz cool dr Fallschirmspringer  
y fall immer so rasch, denn ha n ys ringer !  
Ob Luftwaffe, ob Patrouille Suisse  
Ob positivs ob negativs Gschyss  
D Zuekumft vo dr Luftwaffe goot esoo  
leend aifach e baar Modällflugzyyg koo  
und dr Ueli Maurer sott aanestoo  
mit Färnbedienig und wurd au dernoo  
troztdäm nyt am Himmel goo  
no miesst er numme vo friehner do  
die versteggd Kamera uuseloo  
und immer lutt riefte: «**Dä soll emoll cho!!!**»